

四庫全書

史部

欽定四庫全書

史部

景定建康志卷十七至十九

詳校官監察御史臣沈孫璉

檢討臣德生覆勘

總校官檢討臣何思鈞

校對官中書臣張曾炳

謄錄監生臣陳燦

欽定四庫全書

景定建康志卷十七

宋

周應合

撰

山川志序

疆域帝王之所定也山川天地之所作也金陵未邑秣陵未縣建鄴未都之前或言地有王氣或言有天子氣非山川融結氣何所指哉漢建安中諸葛亮曰鍾阜龍盤石城虎踞真帝王之宅張紘亦曰金陵地形有王者都邑之象自孫權之國江東以至我朝之建行闕帝王

都邑實印斯言

秦皇時望氣者言金陵五百年後有天
子氣乃斷其連岡長隴疏水為淮將以

泄其氣也自是四百九十年而晉元帝渡江中興江左
過符望氣者所言之數是知天地所作豈人力所能變

哉

嘗以山川形勢驗之鍾山來自建鄴之東北而向乎

西南大江來自建鄴之西南而朝於東北由鍾山而左
自攝山臨沂雒亭衡陽諸山以達於東又東為白山大
城雲穴武岡諸山以達於東南又東南為土山張山青
龍石碗天印彭城雁門竹堂諸山以達於南又南為聚
寶山戚家山梓潼山紫巖夏侯天闕諸山以達於西南

又西南綿亘至三山而止於大江此亮所謂龍盤之勢

也由鍾山而右近之為覆舟山為鷄籠山皆在宮城之

後

東南利便書曰吳太初宮晉太初宮及我朝宮城皆北接覆舟山之麓牛首在其前即王導所謂天闕是

矣又北為直瀆山大壯觀山四望山以達於西北又西

北為幙府盧龍馬鞍諸山以達於西是為石頭城亦止

于江此亮所謂虎踞之形也其左右羣山若散而實聚

若斷而實續世傳秦所鑿斷之處雖山形不聯而骨脈

在地隱然相屬猶可見也

左則方山石碗山之間右則盧龍山馬鞍山之間者老相

傳皆以為秦始皇鑿斷長隴之所

石頭在其西三山在其西南兩山可

望而挹大江之水橫其前秦淮自東而來出兩山之端而注於江此蓋建鄴之門戶也覆舟山之南聚寶山之北中為寬平宏衍之區包藏王氣以容衆大以宅壯麗此建鄴之堂奧也自臨沂山以至三山圍繞於其左自直瀆山以至石頭沂江而上屏蔽於其右此建鄴之城郭也

楊萬里詩云周遭故國是三山圓對景方知此句奇偶上伏龜樓上望一環碧玉缺城西

玄武

湖注其北秦淮水遶其南青溪縈其東大江環其西此

又建鄴天然之池也

龍川陳亮論建鄴形勢東環平岡以為安西城石頭以為重帶玄武

湖以為險擁秦淮青溪以為阻是以王氣可乘而運動如意昔人詩詠石頭城有山圍故國潮打空城之句則

石頭城甯臨大江今大江遠石頭玄武湖為平田青溪九曲僅存其一非同昔日也形勢若此帝

王之宅宜哉然自越以來千七百年山川不改城郭屢

更人因地乎地因人乎昔周公定都洛邑曰有德者易

以興豈專恃乎山川哉山川不可以無考耳作山川志

山川志一

山阜

鍾山一名蔣山在城東北一十五里周迴六十里高一
百五十八丈東連青龍山西接青溪南有鍾浦下入秦
淮北接雒亭山漢末有秣陵尉蔣子文逐盜死事於此
吳大帝為立廟封曰蔣侯大帝祖諱鍾因改曰蔣山案
丹陽記京師南北並連山嶺而蔣山峇嶺巖異其形象
龍實作揚都之鎮諸葛亮云鍾山龍盤蓋謂此也

舊志

事跡金陵地記云秦始皇時望氣者云金陵有天子
氣乃埋金玉雜寶於鍾山又云蔣山本少林木東

晉令刺史罷還都種松百株郡守五十株宋時諸州
刺史罷職還者栽松三十株下至郡守各有差庚
闡揚都賦云元皇帝渡江之年望氣者云蔣山上有
紫氣時時晨見晉謝尚齊朱應吳苞孔嗣之梁阮
孝緒劉孝標並隱於此山謙之丹陽記曰出建陽
門望鍾山與覆舟似上東門首陽之與北邙也宋
散騎常侍劉勔經始鍾嶺之南以為棲息聚石蓄水
朝士雅素者多從之游又雷次宗元嘉中開館鷄籠

山文帝為築室於鍾山西巖下謂之招隱館 齊周
顥亦於鍾山西立隱舍遇休沐則歸仍造草堂寺以
處僧慧納寺即顥之所居也後顥出為海鹽令孔稚
圭作北山移文以譏之 梁武帝於鍾山西置大愛
敬寺江表上已多游於此 侯景反邵陵王綸率西
豐公大春等馬步三萬發自京口直據鍾山景黨大
駭具舟欲逃 阮孝緒因母疾用藥須得生人侵舊
傳鍾山所出孝緒躬歷幽險累日不獲忽一日鹿前

行至一所遂不見就求之果得 沈約郊居賦曰惟
鍾巖之隱鬱表皇都而作峻蓋望秩之所宗含風雲
而吐潤又應教詩云靈山紀地德險峭資岳靈又云
勢隨九嶷高氣與三山壯 寰宇記云自梁以前立
佛寺七十所今存者六 陳大寶元年齊軍於秣陵
故縣跨淮立柵引渡兵馬周文育侯安都頓白土崗
旌旗相望齊軍潛至鍾山龍尾進至幙府山皆此地
也 後主與張機游是山常以松枝代麈尾故梅摯

詩有千松麈尾之句 唐地理志江南道其名山衡

廬茅蔣 大厯中處士韋渠年亦隱於此號遺名子

顏真卿題其所隱之堂曰遺名先生三教會宗堂

李白登梅崗望金陵詩有云鍾山抱金陵霸氣昔騰

發 內有定林庵荆公王安石嘗讀書於此

本下定林寺寺

記云宋元嘉中建上定林在寶公塔東下定林在上定林西今皆廢 米元童榜曰昭文

齋李伯時寫荆公真像於壁楊次公為之贊荆公詩

云定林修木老參天是也今獨庵屋數間餘皆不存

慶厯中大宋葉清臣嘗游鍾山之巖住八功德水
後半嶺間可容數人公字道卿因名道卿巖 張文
潛云予自金陵月堂謁蔣帝祠初出北門始辨色行
平野中時暮春人家桃李未謝西望城濠水或流或
絕多鷓鴣白鷺迤邐傍山風物天秀如行錦繡圖畫
中舊讀荊公詩多稱蔣山風物信不誣矣 陳軒金
陵集云鍾山寶公塔名玩珠取龍玩珠之義梅摯詩
云珠峰塔影孤 其山峰最秀者有屏風嶺巧石青

林幽邃如畫在明慶寺前山之東有八功德水在悟
真庵後梅摯記云梁天監中有胡僧寓錫於此山中
乏水時有厖眉叟相謂曰予山龍也知師渴飲措之
無難俄而一沼沸出後西僧繼至云本域八池已失
其一自梁以來嘗取給御府寺僧云飲之可以愈疾
又寶公塔西二里有洗鉢池興國寺西有道光泉以
僧道光穿斲得名曰宋熙泉近宋熙寺之側寺東山
巔有定心石下臨峭壁寺西百餘步有白蓮庵庵前

有白蓮池乃策禪師退居之所又北高峯絕頂有一人泉僅容一勺多挹之不竭皆山之勝處也

石頭山在城西二里案輿地志環七里一百步緣大江南抵秦淮口去臺城九里自六朝以來皆守石頭以為

固以王公大臣領戍軍為鎮其形勝蓋必爭之地云

舊志

事跡宮苑記云周顯王三十六年楚威王滅越置金陵邑即石頭城江乘地記云石城山嶺嶂千里相重若一游歷者以為吳之石城猶楚之九疑也山上

有城因以為名 後漢建安十六年吳孫權乃加修理改名石頭城用貯軍糧器械今清涼寺西是也

諸葛亮云石頭虎踞真帝王之宅 丹陽記石頭城

吳時悉土塢義熙初始加磚累甃因山以為城因江以為池地形險固尤有奇勢亦謂之石首城范曄有初發石首城詩 六朝記云吳孫權沿淮立柵又於江岸必爭之地築城名曰石頭常以腹心大臣鎮守之今石城故基乃楊行密稍遷近南夾淮帶江以盡

地利其形勢與長干山連接 晉伐吳王濬以舟師
沿江而下自三山抵石城劉夢得有王濬樓船下益
州一片降幡出石頭之句 晉室中興常為險要必
爭之地 謝尚賜輅車鼓吹戍石頭 王氏舉兵明
帝以溫嶠守石頭 石城之東有巨石俗呼為塘岡
乃王敦害周伯仁戴若思之處按建康實錄晉元帝
永昌元年敦收周顗戴淵殺於石頭城東塘頽石上
百姓冤之今記其處 蘓峻據石頭王師既集峻攻

大業壘陶侃將救之殷羨曰若救大業步兵不如峻
但當急攻石頭峻必救之大業自解侃從之峻果棄
大業而救石頭 孫恩至京口元顯守石頭 安帝
時宋高祖北討徐道覆盧循棄虛而出帝即班師四
月至都帝曰賊衆我寡分其兵則測人虛實若聚衆
石頭則衆力不分遂移鎮石頭 義熙六年發居民
治石頭城 宋文帝登石頭城極望謂江湛曰向
使檀道濟在虜敢犯吾境邪 石頭倉城在石頭城

內宋元嘉二十七年魏人至瓜步丹陽尹徐湛之守
石頭倉城沈攸之事起齊高帝入朝堂遣戴僧靜將
腹心至石頭經畧袁粲時蘇烈守倉城門僧靜射書
與烈夜縋入城 宋大明中以其地為離宮景和元年
脩為長樂宮昇明中司徒袁粲出鎮於此 齊武帝為
世子即以為世子宮後多以諸王鎮之 梁侯景反
陳武帝與諸軍進景登石頭城望官軍之盛不悅乃
以舡舫貯石沉塞淮口緣淮作城自石頭迄青溪十

餘里樓雉相接帝於石頭城西橫隴築柵直出東北
悉力乘之景遂大潰王僧辯討侯景督衆軍沿流
而下進軍於石頭之斗城安陸王大春以寧遠將
軍領戍軍事於石城徐嗣徽招北齊兵至闕下柳
達摩等保石城陳霸先於石頭南北岸絕其汲路又
堙塞東門城中諸井達摩請和許之霸先陳兵石頭
南門送齊人北歸及至皆殺之以後江邊有警必先
據石頭以為捍禦陳宣帝太建二年其城復加修

築以貯軍食 後主禎明元年徐孝克為都官尚書

性清素常以石頭津稅給之 隋平陳置為蔣州城

輔公柘據江東用為揚州公柘平又於城置揚州大

都督府後移揚州於廣陵此城遂廢 唐武后光宅

中徐敬業舉兵使其徒崔洪渡江修石頭以拒守敬

業平分軍三百人守之尋置為鎮仍徙縣倉以實之

韓滉觀察江東西德宗狩梁州乃築石頭五城自

京口至土山修塢壁起建業抵京峴樓雉相望於石

頭城穿井皆百尺今五城遺址尚存時議者言滉聞車駕在外聚兵石頭陰蓄異志上疑之以問李泌對曰滉公忠清儉自車駕在外貢獻不絕且鎮撫江外十五州盜賊不起皆滉之功也所以修石頭者滉見中原板蕩為陛下將有永嘉之行為迎扈之備耳此為人臣忠篤之慮奈何更以為罪乎李錡據潤州屬別將庾伯良兵三千人築石頭城南徐州記江乘縣西二里有大浦發源於石城山東入大江此山

與盧龍幕府諸山相連迤邐達於京口 左太冲吳
都賦云戎車盈於石頭蓋謂石城也 庾闡涉江賦
曰發中洲之曲泝背石城之巖岨 謝靈運撰征賦
云次石頭之雙岸究孫氏之初基

覆舟山亦名龍山又名龍舟山在城北七里周迴三里
高三十一丈東際青溪北臨真武湖狀如覆舟因以為

名

舊志

事跡宋書云覆舟山在縣東十里鍾山西形如覆舟

輿地志山在樂遊苑內

此山與鍾山形若斷而

脈相連兩山之間土中有石墾者不入知其為山之骨也 宋武帝舉義兵討桓玄玄將桓謙屯於東陵卞範之屯覆舟山西以拒之宋武疑有伏兵謂小將劉鍾曰此山下當有伏兵卿可率部下往取之鍾應聲馳進果有伏兵數百一時奔走 元嘉改名玄武山以其在城之北也 陳高祖時齊兵踰鍾山高祖衆軍分頓樂遊苑東及覆舟山北斷其衝要齊軍至

玄武湖西北幕府山南將據北郊壇衆軍自覆舟東
移頓郊壇北與齊人相對縱兵大戰即此地 宣帝
太建七年輿駕幸樂遊苑採甘露宴羣臣詔龍舟山
立甘露亭鮑昭有侍宴覆舟山詩 宮苑記云闔風
亭甘露亭瑤臺皆在山上

鷄籠山在城西北六七里高三十丈周迴一十里輿地
志云在覆舟山之西二百餘步其狀如鷄籠因以為名

舊志

事跡寰宇記云西接落星澗北臨栖玄塘 宋改名
龍山以黑龍常見真武湖此山正臨湖上故名 元
嘉十五年立儒館於北郊命雷次宗居之次宗因開
館於鷄籠山齊高帝嘗就次宗受禮及左氏春秋

竟陵王子良嘗移居雞籠山下集四學士抄五經百家
為四部要略千卷 晉元明成哀四帝陵皆在山南
幕府山在城西北二十里周迴三十里高七十丈按輿
地志在臨沂縣東八里晉元帝自廣陵渡江丞相王導

建幕府於此山因名焉山上有虎跑泉其西巔有仙人

臺其北里俗相傳即古之宣武塲也

舊志

事跡寰宇記云在城西北東北臨直瀆浦西接寶林

山南接解浦山有五峯南接盧龍石頭宋文帝

元嘉二十七年魏人入寇至瓜步登幕府山觀望形

勢三國典略曰齊師伐梁大至於鍾山龍尾周文

育請戰陳霸先曰兵不逆風文育曰事急矣當決之

何用古法抽槊上馬殺傷數百人齊軍乃退屯幕府

山又霸先衆軍自覆舟東移頓郊壇與齊人相對霸
先自率帳內麾下出幕府山南與吳明徹沈泰等首
尾擊之齊人大潰陳史載武帝破北齊軍四十六萬
於幕府山下即此事也 後主禎明中嘗幸此山校

獵 宋明帝高寧陵在山西晉王導溫嶠亦葬山西

盧龍山在城西北二十五里周迴一十二里高三十六

丈東有水下注平陸西臨大江今張陣湖北崗隴北接

靖安皆此山也

舊志

事跡晉元帝初渡江見此山嶺綿延遠接石頭真江
上之關塞以北北地廬龍山因以為名 此山舊與
馬鞍山相接氣勢雄包自秦鑿為二後置都船塢聖
妃廟其間至今溝內石骨連焉

馬鞍山在城西北十里西臨大江東與石頭城接高八

十五丈以形似得名

舊志

事跡舊志載陳禎明三年宜黃侯慧紀遣南康太守
魯肅以鐵鎖橫江隋楊素與魯肅爭馬鞍山四十餘

戰隋軍死者五千人指為此地今考之史傳陳無魯
肅慧紀所遣者南康內史呂忠肅也所爭馬鞍山乃
在巫峽間非此地也山名偶同耳詳見諸辨

四望山在城西北一十里周迴三里高一十七丈東至

龍安西臨大江南連石城北接盧龍山

舊志

事跡吳大帝嘗與葛玄共登鳳凰二年殺司市郎中
陳聲投於四望山下 晉蘇峻反溫嶠奉陶侃為盟
主同赴京師嶠於四望磯築壘以逼賊曰賊必爭之

設伏以逸待勞是制賊之一奇也

大壯觀山在城北一十八里周迴五里高二十八丈東連蔣山西有水下注平陸南臨真武湖北臨蠡湖

事跡陳宣帝起大壯觀於此山因以為名 太建十一年八月幸大壯觀因大閱武命都督任忠領步騎十萬陣於真武湖上登真武門觀宴羣臣因幸樂遊苑設絲竹之會仍重幸大壯觀振旅而還

直瀆山在城北三十五里周迴二十五里高一十七丈

卷十七
旁有直瀆洞東西有水流入大江

舊志

事跡見直瀆下

以上諸山皆在鍾山之右自城北綿亘達於城西

臨沂山在城東北四十里周迴三十里高四十丈東北接落星山西臨大江西南有臨沂縣城

雉亭山在城東北四十里周迴六里高五十丈北與雉

臨沂縣相望今隸慈仁鄉俗又呼為騎亭山

舊志

事跡石邁古跡編云舊說齊武帝東游鍾山射雉因

以為名或云吳大帝時蔣帝神執白扇乘馬嘗見形於此故又呼騎亭山

衡陽山在城東北四十五里周迴九里高二十九丈在清風鄉東臨清塘西北有水下湖南接雉亭山

舊志

事跡舊傳朗法師嘗住此有衡陽神女忽來聽講後遂為此神因名其山曰衡陽今鍾山鄉資福院有神像可攷

攝山一名織山蓋其狀似織也在城東北四十五里周

迴四十里高一百三十二丈東連畫石山南接落星山

西北有水注江乘浦入攝湖

舊志

事跡輿地志云江乘縣西北有扈謙所居村側有攝

山多藥草可以攝生因名焉江乘記云攝山形方

四面重嶺南史齊明僧紹住江乘攝山後捨宅為

寺今棲霞寺是也山有千佛嶺按江總棲霞寺記明

僧紹居士之子仲璋為臨沂令於西峰石壁與度禪

師鐫造無量壽佛大同六年龕頂放光齊文惠太子

豫章文獻王竟陵文宣王始安王及宋江夏王霍姬
齊田真等琢造石像梁臨川靖惠王復加瑩飾嶺中
道有沈傳師徐鉉張稚圭王雱等題名 梁紹泰中
陳霸先與齊師戰大敗之追奔至攝山虜蕭軌誅於
城下即此也 陳後主與江總同遊有詩 陳軒所
集金陵有懷攝山十題曰白雲庵清風軒唐公巖天
開巖宴坐臺中峰澗明月臺品外泉醒石磬石

白山在城東三十里周迴八里高八十丈東接竹堂山

南接蔣山北連攝山西有水下注平陸

舊志

事跡輿地志云階礎碑石及麒麟獅子以石為之者
悉出於此山 南史梁散騎常侍韋載有田十餘頃
江乘縣之白山天嘉元年遂築室居山屏絕人事不
入籬門者十載

苻堅山在城東六十里周迴一十五里高六十丈北連

大城山

舊志

事跡謝玄破秦歸謝安在墅城問其方略玄於原野

陳其營壘陣場次序指此山曰此若苻堅駐軍之山也因以為名

大城山在城東七十里周迴二十二里高八十二丈南連苻堅山西連鴈門山北連竹堂山

雲穴山在城東八十五里周迴二十里高九十七丈南有水流入石驢溪有洞穴甚幽邃天欲雨則穴中雲出因名之

癸山按十道四蕃志有癸山在城東北四十七里碑石

磴礎多出於此

武崗山在城東二十五里里俗呼為石佛子廟

舊志

事跡按石邁古跡編山有石佛十餘軀舊傳唐武后造未詳鄉民歲時祈禱一名墓山

土山一名東山在城東南二十里周迴四里高二十丈

無巖石故曰土山

舊志

事跡輿地志云山下有湖自江山至京師此為半道今謂此山下道為半邏晉石季龍入寇蔡謨所戍

自土山至江乘 太元八年秦苻堅率衆號百萬次
於淮淝京師震懼命謝安征討大都督謝玄入問計
安夷然無懼色答曰已別有旨既而寂然玄不敢復
言乃令張玄重請安命駕出土山墅張宴親朋畢集
方留玄圍碁賭別墅遊涉至夜方還府內逮明指授
將帥各當其任又於土山營立樓館植林竹甚盛每
携中外子姪往來遊集肴饌日費百金世以此頗譏
之安殊不屑意 上元縣有兩東山一在崇禮鄉即

土山是也晉書謝安寓居會稽棲遲東山此安之舊
隱也在會稽後於土山營築以擬東山今去縣二十
里一在鍾山鄉蔣廟東北宋劉劬隱居之地劬嘗經
始鍾嶺以為棲息及造園宅名為東山今去縣十五
里陳軒金陵集載李白李建勲東山詩皆指土山而
作梁書宋謝朓十歲能屬文父莊游土山使朓命
篇攬筆便就梁末蕭正德亦修築以為墅沈約
郊居賦云臨巽隅兮縱目即堆塚而流盼雖東山之

培塿乃文靜之所宴

張山按石邁古跡編在城東南三十里淳化鎮之北舊

隸江乘縣

舊志

事跡南史齊欽明皇后葬江乘縣張山或云今城東北六十里章橋西又有張山亦古江乘境

青龍山在城東南三十五里周迴二十里高九十丈

今漂

陽縣界別
有青龍山

事跡南唐後主嘗校獵於此

祈澤山有祈澤寺在城東南三十五里周迴一十里高

五十丈東連彭城山北連青龍山

舊志

事跡舊經云初法師嘗結茅於此有龍女來聽講既而神泉湧於講座下後遂為祈禱水旱之所因此得

名

丁山在城東南四十里周迴一十七里高二十七丈

石碗山在城東南四十里周迴一十五里高二十七丈

在上元縣崇禮鄉去縣二十五里一名竹山

舊志

事跡祥符圖經云有大龍悉是石故名石碗或云碗亦作櫃每春夏水溢衆流匯此山橫據秦淮之上以櫃遏水勢輿地志秦始皇時望氣者云江東有天子氣乃東遊以壓之又鑿金陵以斷其勢今方山石碗是其所斷之處也孫盛云東至方山有直瀆自瀆至此山或云是秦所掘山今方山西九里有大龍枕淮合龍悉是石京師溝塘累石悉鑿此龍取之

方山一名天印山在城東南四十五里高一百一十六

丈周迴二十七里四面方如城東南有水下注長塘流
既平陸輿地志湖熟西北有方山山頂正方上有池水

丹陽記形如方印故曰方山亦名天印山

舊志

事跡秦始皇鑿金陵山疏淮水此山乃其斷者故沈
約郊居賦云聊遷情而徙睇識方阜於歸津帶修篁
於桂渚肇舉鋪於強秦陳沈炯詩云淮源比桐栢方
山似削成 吳大帝為仙者葛玄立觀於此山 晉
謝靈運東出鄰里送至方山嘗賦詩 宋何尚之為

尚書令元嘉末致仕退居方山著為賦 齊武帝嘗
幸方山顧左右曰朕欲經始山之南復為離宮期勝
新林苑徐孝嗣答曰繞黃山款牛首乃盛漢之事今
江南未廣願少留神乃止 徐嗣徽兵至秣陵故治
齊人跨淮立柵度兵夜望方山嗣徽等列艦於青堆
至於七磯以斷周文育歸路文育鼓譟而發嗣徽等
不能制今方山南有青堆埠即其地 隸句容者名
東方山非此所謂方山也

彭城山有彭城館在城東南四十五里周迴九里高二十七丈西連祈澤山北連青龍山

湯山在城東南六十里西接雲穴山山不甚高無大林木有湯泉出其下大小凡六處湯澗繞其東南四時常熱禽魚之類入者輒爛以煮豆穀終日不熟草木濯之愈鮮茂舊有湯泉館今廢

餘見聖湯院

雁門山在城東南六十里周迴二十里高一百二十五

丈西連彭城山南連大城山北連陵山

舊志

事跡山勢連綿類北地雁門故以為名。輿地志云
山東北有溫泉可以浴飲之能治冷疾

竹堂山在城東南七十五里周迴一十六里高九十二
丈東連雲穴山西連白山南連大城山北有水下注平

陸

舊志

事跡輿地志云白山雁門山竹堂山並連帶在建康
縣東北綿聯三四十里

橫山在城東南一百二十里周迴八十里高二百丈

舊志

事跡山謙之丹陽記云丹陽縣東有橫山連亘數十里或云楚子重至於橫山是也又曰橫望山四面望之皆橫故有是名在城西南一百二十里接連太平州界

戚家山在城南天禧寺東

事跡鄭文寶南唐遺事云韓熙載居戚家山

梓桐山在城南一十五里高三十八丈山下有謝氏詩樓及繡經臺基存

聚寶山在城南雨華臺側上多細瑪瑙石俗呼為聚寶山

紫巖山在城南一十五里高三十八丈

舊志

事跡陳軒金陵集載李建勲春日紫巖山期客不至
詩巖山在城南周迴一十五里有吳紀功德石山
謙之丹陽記曰秣陵縣南有巖山山西有石室山東
大道左有方石長一丈刻勒銘題贊吳功德孫皓所
建也宋孝武帝改曰龍山明帝泰始中建平王休祐

從上於巖山射雉日欲暮上遣左右壽寂之等逼休
祐令墜馬因共毆殺之

夏侯山在城南二十二里周迴十里高三十五丈儀同
三司夏侯亶居此因名之

甌蔽山在城南二十三里周迴八里高二十五丈以形
似名之

牛頭山狀如牛頭一名天闕山又名仙窟山在城南三
十里周迴四十七里高一百四十丈

舊志

事跡六朝記自朱雀門沿御道四十里至山下西峰
中有石窟不測淺深梁武帝於下建寺名曰仙窟山
又云山南有芙蓉峰北有大石如卧鼓其山中空可
坐數十人其高九尺上下有小石異時呼為石鼓

河圖內元經云山南峯地面有石洞高一丈五尺中
有路相通時號為石鼓天欲雨則石鼓自鳴 宋書
云山之南峰大明中嘗立南郊壇於其上 朱京登
牛頭山詩有削成雙峰玉骨清之句 建炎四年岳

飛敗金人於清水亭烏珠復趨建康飛設伏於牛頭
山上待之飛又以騎三百步卒二十人自牛頭山馳
至南門新城為營遂大破烏珠之衆所獲負而登舟
者盡以戈殪於水物委於岸者山積

觀子山在城南三十里周迴四里一百步高八十三丈

東有水下注新林浦

舊志

吉山在城南四十五里周迴三里高一十丈西臨大江

舊志

事跡宋征虜將軍建城侯吉翰葬於此因以為名

大青山在城南四十五里周迴三十五里高一百二十

五丈西有水下注平陸

陰山在江寧西南一十二里臨大江

舊志

事跡王導至此有陰山神見夢於導導乃以其事聞
上為立廟時人遂名其岡曰陰山

三山在城西南三十七里周迴四里高二十九丈

舊志

事跡吳志天璽四年晉琅邪王伋帥六軍濟自三山

晉書王濬自蜀發兵攻無堅城夏口武昌無相支
抗於是順流鼓棹徑造元和郡國志云王濬伐吳
宿於牛渚部分明白前至三山即此三山也輿地
志云其山積石森鬱瀄於大江三峯行列南北相連
號三山鮑昭有還都至三山望石頭城詩謝元
暉有曉登三山還望京邑詩李白有詩云三山半
落青天外是也

自臨沂而下諸山皆在鍾山之左遼府城東北隅達

於城東轉東南隅以達於城南又轉西南隅及西而止
於江與隔水石頭城馬鞍諸山相望其地脈山勢似斷
而續似散而聚似遠而近環抱拱挹真如龍之盤也

右在上元縣界

湖山在江寧縣南三十里周迴七里高七十丈上有湖
久旱不涸

車府山在江寧縣四十里周迴九里二百步高一百丈
六朝常於此山藏車乘器甲故名

祖堂山在江寧縣南四十五里周迴四十里高一百二

十七丈東有水下注平陸

舊志

事跡宋大明三年於山南建幽棲寺因名幽棲山

唐貞觀初法融禪師得道於此為南宗第一祖師乃

改為祖堂山

落星山在江寧縣西南五十里周迴二里高一十丈西

臨大江

舊志

事跡舊圖經云昔有大星落於此因以名之

銅山在江寧縣東南七十里周迴一十九里高一百丈

舊志

事跡昔人採銅於此山故名 陳軒金陵集載鮑昭

過銅山掘黃精詩云銅山晝深沉乳竇夜涓滴即此
也屬江寧縣句容縣北溧水縣西亦各有銅山皆舊
日採銅處

烈山去江寧縣西南七十里近處真鄉

舊志

事跡近烈洲臨江中流故曰烈山其山四面峭絕下

瞰大江風濤洶湧商旅常泊舟依山以避風絕頂叢

棘中舊有侯將軍廟

陳永定初王琳聚兵於襄陽以宛臺城造黃龍舟十艘泊於荻

港阿而發忽西南風急琳謂得天助張帆直抵臺城而下陳將侯瑱泊舟三百於蕪湖隨後而發戰於烈山之下用抬竿以撞琳船遇之則破琳擲火焚之風逆自焚遂大敗奔魏上人以侯瑱功烈甚感故名山曰烈山以祠祀之歲久舟人以為陳脾頭祠矣

寶祐初忽有僧披荊棘建庵

其上自名為江心護國寺

曾慥百家詩選載晁無咎云金陵南數十里江心烈

山岬然特起猶金山也家人云安得隱居于此作一絕云山如浮玉一掌立江似海門千頃開我欲此中

成小隱莫教

山脚有船來

白都山在江寧縣西南七十里周迴五百步高闕丈

西臨大江

舊志

事跡輿地志昔白仲都嘗於此山學道白日昇天因以為名 吳志諸葛恪誅子竦載其母而走孫峻遣將軍張承追斬於白都即此也

鼓吹山在城南八十里周迴一十七里高八十丈東北有水四望孤絕宋孝武大明七年自江寧縣南登山及陵望臺蓋登山奏鼓吹因以為名

龍山在城西南九十五里周迴二十四里高一百一十二丈入太平州當塗縣北有水以其山似龍形因以為名

慈姥山在城西南一百一十里二百步周迴二里高三十丈輿地志山積石臨江岸壁峻絕山上出竹堪為簫管山南有慈姥神廟因名焉

天竺山在江寧縣西南一百二十里周迴一十七里高

一十九丈

舊志

事跡東南有水下注慈姥浦其北連岡十里本名多
墅山唐上元二年有天竺興福寺僧道融移寺於此
山因以為名

右在江寧界

茅山在句容縣東南四十五里周迴一百五十里初名
句曲山像其形也茅君得道更名曰茅山三十六洞天
之數第八者曰金壇華陽之天此山是也

事跡史記封禪書云禹封泰山禪會稽晉灼曰本名

茅山吳越春秋云禹巡天下登茅山以朝羣臣更名
茅山為會稽亦曰苗山 茅山記曰大茅山獨高處
黑帝命東海神埋大銅鼎於山頂深八尺上有盤石
鎮之又曰秦始皇帝二十七年遊會稽還於此山埋
白壁一雙深七尺李斯篆刻文云始皇聖德平章江
山巡狩蒼川勒銘素壁又曰王莽地皇三年七月遣
使者章邕獻銅鐘五口黃金百鎰贈之於三茅君又
曰光武建武元年遣使吳倫齎黃金五十斤獻三茅

君今山頂有埋金處上有聚石又曰中茅山獨高處
司命君埋丹砂六千觔鎮於此山深三丈上有盤石
鎮之其山左右泉流下皆小赤色飲之延年益壽左
真人就司命君乞得一十二觔以合九華丹山頂石
壇石案香鑪今存今三陽百姓多長壽者蓋太陽北
陽朱陽三村耳 茅君內傳曰句曲山秦時為華陽
之天三茅君居之因以為名外有金壇山因壇為號
周時名其源澤為句曲之穴按山形曲折後人名焉

真誥曰漢宣帝時有三茅君得道掌此山故謂之
茅山又曰金陵句容之句曲洞為第八洞天又曰句
曲地肺土良水清謂之華陽洞天可以度世種民是
處五災不生又曰金陵洞墟之膏腴句曲之福地履
之者萬萬知之者無一

內經福地志曰伏龍之地在柳谷之西金壇之右可以高

棲金陵之福地也許邁別傳曰延陵之茅山是洞庭西門潛通五嶽茅君雜記云一名句曲山即三十六洞天華陽第八洞天也周迴一百五十里東西四十五里南北二十里洞五門三門顯二門隱又按陶先生茅山記略云東通王屋西達峨嵋南接羅浮北連岱嶽漢元帝時咸陽人茅盈茅固茅衷並此山得道

故號茅山三人常乘白鶴各據一嶺唐咸通中東海
蓬萊觀龔道者初入此山辟穀茹芝十餘年後因月
朔正旦焚香洞門恍惚之間得入洞中經由一十三
日備見洞府巖壁山川星辰日月靈異難詳茅濛
字初成華陽人也隱華山修道秦始皇三十一年白
日上昇是時先有民謠曰神仙得者茅初成駕龍上
昇入太清時下玄洲戲赤城繼世而往在我盈始皇
聞之問故老曰此僊謠也於是尋仙之意濛之元
孫盈得道于金陵句曲山上昇為東嶽上卿司命真
君太元真人居赤城時來句曲邦人改句曲為茅君
山圖經云漢時有三茅君各乘一白鶴來居其上故
號為三茅君世傳茅盈茅固茅衷皆茅濛之後也山
在句容縣東南四十五里華山華陽縣皆在句容縣
王荆公有詩云一峰高出衆山巔疑隔塵沙道里
千俯視烟雲來不極仰攀蘿藦去無前人間已換嘉
平帝地下誰通句曲天陳迹是非分草芥紛紛流俗

尚師傳

蘇魏公

頌詩

三士

隱淪

地上

林句

曲前

竭

來思訪

道屬賦

望遊仙

松隱飛

輪路

雲收

積玉

巖華

陽不知

遠超駕

似行天

周益公

必大詩

千峯

深陽

來勢若

西南奔

遙拱三

茅峯

不敢迫

至尊三

茅如軒

縣次第

儼弟昆

正西閭

吳塗

羣仙

山中有

大茅峯

在

崇

之所門

至今下

泊宮往

往彌旗

幡

山中有

大茅峯

在

崇

壽觀北

舊記云

在崇

僖觀

北獨高

處昔

青童

道君

乘

颺舉少

憩於此

今猶有

故颺

輪之

跡山之

半有

繡衣

亭昔三

天使者

衣繡衣

執金丹

以九錫

之命詔

大茅

君故以

為名山

之巔有

泉名曰

一人泉

汲之不

竭

中茅峯

在積金

山北其

側有泉

色赤而

有味真

語小

云飲之

延年

山下之

民率皆

眉壽而

無疾

小

茅峯

在中茅

峯之背

有抱朴

峯即大

茅峯北

相連一

峯是

白雲

峯

如卧龍

松左徂

耨

抱朴

峯即大

茅峯北

相連一

峯是

白雲

峯

在中茅

峯之背

有抱朴

峯即大

茅峯北

相連一

峯是

白雲

峯

峯

峯西

五雲

峯在小

茅峯之

側華陽

洞上積

金峯

金

峯

金

以三月十八日駕五色之雲八景之輿
行於此山邇時而去故號為五雲峰
積金峯在大茅峯

中茅峯之間二峯相連其長阿中有連石古謂之積
金峰陶隱居所住之東有一橫壑與之相對壑皆是

石石形甚壞
疊玉峯圖經云大茅山上東南三山疊
奇即此峯也積亦有洞穴俗多呼疊石石之

與玉猶為同類又作三角呼三角山今與葛僊壇相
通真宗未生仁宗時嘗遣左瑄詣茅山禱祈遇異人

言玉真人已降生於宋朝瑄問玉真人本是何人答
曰古燧人氏章懿皇后亦夢羽衣數百人從一僊官

自空而下曰此託生於夫人及生宮中火光屬天始
行步常持槐木簡以劬錯之真宗問曰何用曰試錯

火耳帝顧后妃曰異人之言
華蓋峯在崇壽觀東南又有四
信不虛矣今刻石元符宮

平山真誥曰大茅西南有四平山俗謂之方山其
下有洞屋名方臺又曰幽館惟得道者處焉良

常山

秦始皇登句曲山北嘆曰巡狩之樂莫過於山海自今以往良為常也爾乃犀臣並稱壽歎曰

良為常矣乃改句容北垂為良常之山

華姥山

茅山記孫寒華即吳大帝之孫女於茅山修道

成冲空而去號其山為華姥山徐鉉復禁山記曰華陽洞天金陵福地羣僊之所都會京福之所興作故其壇宇之盛答享之殷修奉之嚴樵牧之禁冠於天下聖歷中官失其守望拜之地多所荒蕪天祐間正素先生王君棲霞始復禁山之地由良常洞至雷平山十里而近入於萌隸者盡贖之芻蕘者不得輒至墟墓不得雜處藝樹蔽野柷松為門川梁必通榛穢必剪建方壇於雷平之上造高亭於良常之前朝奉有至誠之地游居有抗駕之所姜已占國秦望舊封肅然清光復如開元天寶之盛矣陳軒金陵集張公環詩云人間獨有當時月山際猶無後世樵蓋謂此也

勅禁山碑

訪聞茅山界內祠廟寺觀之側樹木多有諸色不顧條法擅行樵採及放野火焚燒

山林須議專行指揮國家方延景覲以祐蒸民眷彼名山存于方志或仁慈所治或真宇攸依是為降福之場允為棲神之所故宜加禮敬答儲休豈可斤斧竟錄樵薪無節致嘉生之罔植使靈跡以何觀爰伸禁止之文用表肅恭之意令下昇州潤州候宣命到於茅山四面立定界止嚴行指揮斷絕諸色人并本寺觀祠宇主首已下自今後不得輒有樵採斫伐及放野火燒墓令地分巡檢官吏耆生壯丁覺察檢校如有違犯便仰收捉押送所屬州縣勘斷訖枷項示眾半月滿日疏放如斫伐數多情理難恕即仰收禁奏候指揮當行決配如是逐寺觀祠宇之外無有供燒柴山不是古跡之內久來存留樹木即仰本縣官吏與寺觀等主者同共指定界止堅立標記方得採取若是已有斫伐延燒到樹行掃疎處亦仰隨處州

縣勒定數目去處常依時裁種補填務要別無空闕
即不得輒便搔擾仍將此宣命指揮於寺觀門首及
往來要路錫石曉示知悉
大中祥符二年奉勅如右

絳巖山一名赭山在句容縣西南三十里周迴二十四

里高一百六十五丈上有龍坑祠壇

舊志

事跡地志云漢丹陽縣北有赭山其山丹赤故因以

名郡 寰宇記云本名赤山唐天寶中改為絳巖一

名赭山一名丹山丹陽之義出此山極險峻臨平湖

山之巔頗坦夷惟隻路可通舊傳五季之亂居民避

難於上往往獲免後斫山者常於其地獲銅錠劍器
之屬建炎兵火鄉民又依之以免禍者甚衆

姜石山在句容縣西北二十五里有梁南康簡王墓

射鳥山在句容縣西北五十里周迴一十五里高一
十七丈

五墓山在句容縣北五十里周迴二十里高二十五丈
銅山在句容縣北六十里周迴二十里高八十七丈以
舊出銅故名

戍山在句容縣北六十里周迴一十一里高一十五丈
北臨大江俗傳沈慶之屯兵於此因以戍名

竹里山在句容縣北六十里按方輿記云行者以其途
傾嶮號曰翻車峴鮑昭有行翻車峴詩

事跡元和郡國志云山間有長澗高下深阻舊說似
洛陽金谷隆安二年王恭舉兵於京口仗劉牢之為
爪牙使帳下督顏延為前鋒牢之至竹里斬延以降
還襲恭宋武帝起義自京口至江乘破桓玄將吳甫

之於竹里移檄京師

華山在句容縣界按方輿記云梁武帝輿駕東行至此山因問華山何如蔣山高薛對云華山高九里似與蔣山等泉水倍多

花碌山在句容縣北五十里周迴一十七里高二十六丈舊有礮坎

秦山在句容縣南三里有明月灣通秦淮父老相傳謂謝安月夜乘舟垂釣於此今釣基尚存

鬱豐山在小茅峰之東北草木鬱茂故以為名俗呼為大橫山學道者多居於此山下有泉昔有人就此合神丹而升玄洲山之東有古越翳王塚

龍尾山在大茅峰之東隱然而高狀若龍尾焉案茅山記云從大茅一嶺直至山東接延陵界如龍狀大茅山為頭壘如龍尾故以龍尾為名

東方山在句容縣東南四十里周迴一十五里高四十二丈東連僊几山

周山在句容縣南三十五里周迴一十里高一十丈
伏龍山在柳汧之間柳汧即柳谷泉與中茅峰相近狀
如龍其上產金昔人採之

雷平山在伏龍山之東周時有雷氏養龍來往此山與
許長史所營之宅相對其山北有柳汧水或名曰田公
泉昔田公嘗居此

方隅山在雷平山之東北以三小山相隅故也昔有人
合九鼎丹於此山下亦有洞室名曰方源館

丁公山乃積金峰之西麓也今崇禧觀以為主峰

僊韭山在崇壽觀西獨小山也真誥云姜叔茂種五辛菜常賣此以市丹砂今山多大韭即其種也

崙山在句容縣東北五十里周迴一十五里高一十七丈東連駒驪山四十二福地也唐肅宗時謁者伍達靈在此山得道丹成之後記於石壁在絕頂尚存髣髴可辨山下又有伍達靈潭

駒驪山在句容縣東北六十里周迴二十五里高三十

九丈

僊姑山在句容縣東四十里茅山之側周迴五里高一

十丈

僊几山在句容縣東南四十里茅山側周迴三里一百

步高八丈東連僊姑山

了頭山在句容縣東南三十五里周迴一十五里高四

十二丈東連僊几山

浮山在句容縣南三十五里周迴一十里高一十二丈

西接周山

曹山在句容縣北三十五里周迴一十二里高一十六丈

亭山在句容縣北三十里周迴一十五里高二十丈

青山在句容縣北六十里鬱置山西乾元觀北周迴一十里高一十三丈北臨大江又觀東一山名東青山西一山名西青山東青山在茅司徒廟東

土石山在句容縣東三十里

虎耳山在句容縣東三十里

岡山石名此山為福地記云岡山之間有伏龍之鄉可以避病

鼈足山在僊韭山之西

竹山今藏真觀前一山上多篠者是也陶隱居云自大茅山南後韭山竹山吳山方山從此疊嶂達乎吳興天目諸山至乎羅浮窮乎南海也

右在句容縣界

中山在漂水縣東南一十五里高一十丈周迴五里圖經云宣州中山又名濁山漂水縣東一十里不與羣山連接古老相傳中有白兔世稱為筆最精元和郡國志云中山出兔毫為筆精妙山前有水源號曰濁水輿地志云宣州漂水縣有濁山有濁水流演不息即此也

舊志

藝苑雄黃云比觀張文潛明道雜誌首載白樂天紫毫筆詩云宣城石上有老兔食竹飲泉生紫毫子嘗問宣州筆工云毫用何處答曰皆陳毫宿州客所販宣自有兔毫不堪用益兔居原則毫全以出入無傷也宣兔居山出入為荆棘樹石所傷毫例短秃則白詩非也白公宣州發解進士宜知偶不問爾按北

戶錄說兔毫處云宣州歲貢青毫六兩紫毫三兩
後又云玉羲之歎江東下濕兔毫不及中山由是而
言則宣城亦有兔毫不及北方勁健為可用也然則
毛穎傳李太白詩所言中山非漂水之中山明矣

東破山在漂水縣東南五十五里高二十三丈周迴一
十七里梁大同二年採銅於此

東廬山在漂水縣東南一十五里高六十八丈周迴二
十里有水源三一源自山西流入秦淮一源出山東北
流入馬沉港一源自山東南吳漕流入丹陽湖山謙之
丹陽記云縣東有廬山與丹陽分界十道四蕃志太平

寰宇記皆云俗傳嚴子陵結廬於此或云形似廬舍因此為名

馬占山在漂水縣東南三十五里高一十八丈周迴一十三里梁大同二年採銅於此

鹽船山一名感泉山在漂水縣南一十二里高二十一丈周迴一十八里山陰有青絲洞泉脈泓澄四時不竭南有張沈二士書堂井臼遺址不知何時人也

杜城山在漂水縣南一十二里高六十丈周迴五十五

里隋大業末杜伏威嘗屯軍於此因號杜城山舊有廟及戰場

竹澗山在溧水縣東南一十八里高一十二丈周迴八里

石城山在溧水縣東南二十五里周迴二十四里高六十丈上舊有石城院冷水亭基

小茅山在溧水縣西南五里高一十七丈周迴四里

荊塘山在溧水縣南一十里高三十七丈周迴二十里

稟丘山在溧水縣西三十里高三十七丈周迴二十里
上有井泉及稟丘山寺基唐太和中寺廢有石龕方丈
存

鳳棲山在溧水縣西南七十里高一十六丈周迴八里
西並石臼湖父老云昔有鳳凰棲其上因得名曰鳳棲
此山屬儀鳳鄉迤北有鳳賢圩今作黃西非也

臘山在溧水縣西南六十里高一十四丈周迴一十五
里西並石臼湖

崔壘山軍山塔子山馬頭山並在漂水縣西南七十五里石白湖內

澳洞山在漂水縣西南二十五里高三十一丈周迴一十八里內有祈雨潭禱之多應

游子山在漂水縣南八十二里高二十丈周迴一十里有石壇舊經云昔孔子適楚嘗經此山

蘆塘山在漂水縣東南二十三里高一十五丈周迴一十二里梁大同二年嘗採銅錫於此

琛山在溧水縣西一十五里高一十一丈周迴一十五里舊經云山嘗產玉因此得名

回峰山在溧水縣東南四十里高三十七丈周迴一十七里上有龍池下有龍泉東有水注平陸

石羊山在溧水縣西南三十七里高七十丈周迴四十里

土山在溧水縣南五十里高一十丈周迴六里

三山在溧水縣東南一十里高九丈周迴一十里

官塘山在溧水縣東南二十五里高一十一丈周迴一十五里下有大塘

芝山在溧水縣東南七十里高三十九丈周迴四十里上有李子洞燕洞相去三百步昔宣州田頔舉兵邑人攜老幼於此避難可容數千人李洞有泉沸涌燕洞有石燕遇雨則飛晴則還落為石

銅山在溧水縣西四十里高二十四丈周迴一十三里舊經云昔嘗採銅於此今爐冶舊址猶存

玉泉山在溧水縣南一百一十里高三十二丈周迴一十八里

卧龍山在溧水縣北二十三里高一十四丈周迴一十里

赤虎山在溧水縣北三十三里高一十丈周迴十里
白石山在溧水縣北二十里高一十丈周迴十一里

荆山在溧水縣東南七十里高四十二丈周迴二十里

舊志云卞和獲玉之地誤也

卞和泣玉荆山之下其山乃在荊州不在揚州

峒峴山在溧水縣東二十里高一十丈周迴八里

李墅山在溧水縣東三十里高二十丈周迴一十六里
與句容縣茅山相接

鹿子山在溧水縣東一十五里高一十丈周迴九里東
接峒峴山

浮山在溧水縣東三十七里高三十丈周迴二十里與
句容縣茅山相接

僊杏山在溧水縣東南四十三里高三十丈周迴一十

三里舊經云絕頂有杏林及僊人足跡因以名之又有
僊壇三所及丹井一名僊壇山下有清泉流入丹陽湖

元祐中知縣周邦彥有僊杏山詩云僊人藥光明夜
燭種杏碧山如種玉春風裂石鳳收花赤顆離離照
山谷卿雲承日作陰潤猛虎守山防採斲高真筐篚
入時貢望拜通明薦新熟珠旒額首一破顏氣壓蟠
桃羞若木自從移植近星榆山水無光靈鬼哭長松
枯倒流液盡擢疎索藤多撲檄我思百年訪靈異羽
褐雖存言語各本非民上宰官身欲斷人間煙火穀
行尋幽洞覓丹砂隙見懼僊騎白鹿便應執帚洗僊
壇不用纖
纖掃塵竹

愛景山在漂水縣東北二十五里高一十三丈周迴一

十里與烏山相接

烏山在溧水縣北二十里高二十八丈周迴十五里

鷄籠山在溧水縣北三十里高一十七丈周迴一十二里與爰景烏山相接

方山在溧水縣東南六十五里高一十二丈周迴九里南有青龍洞與芝山相接

赭山在溧水縣東南五十里高一十九丈周迴二十一里

靈嶽山在溧水縣東南六十里高二十一丈周迴一十五里

南鷄籠山在溧水縣東南一百二十里高三十二丈周迴二十里

遮軍山在溧水縣南八十五里高五十五丈周迴二十三里山北有水下入固城湖

太山在溧水縣南七十六里高三十四丈周迴二十五里

秀山在溧水縣南九十五里高二十三丈八尺周迴九里一百步西南有水下注平陸舊名禿山近因秦氏居之遂易今名

禪林山在溧水縣南八十里高四十一丈周迴一十八里上有寺

黃山在溧水縣東南一十里高九丈周迴一十里

溧陽山在溧水縣東南一十二里高二十五丈周迴七里一百步俗號馬鞍山取其形似也

濁山在漂水縣東南一十里高一十丈周迴五里山北濁水出焉輿地志云漂水縣有濁山下有濁水即秦淮之源也

右漂水縣界

巖山在漂陽縣西十一里周迴五里高二十丈晉咸和中李閔追及張健之所

桂林山在漂陽縣西南三十里周迴十五里高五十丈汪內翰藻記挹秀堂云南則翠陰晴嵐與人應接者桂

林諸山也

龍潭山在溧陽縣南四十五里周迴十五里高二十七丈上有龍潭清澈見底潭側有龍王祠禱之有應

虎山在溧陽縣西南五十里周迴五里高二十丈

青山在溧陽縣南六十里高十七丈周迴十里

神山在溧陽縣南四十里高五十丈周迴二十里

朝山在溧陽縣西南二十里高十五丈周迴五十里

盤白山一名高邃山在溧陽縣西南四十里高五十六

丈周迴十里今太虛觀在其下故俗名觀山第二峰石上有僊人跡觀有碑載晉盤白真人事跡

伍牙山一名護牙山在溧陽縣西南六十里高一百七

十丈周迴四十里

舊志

事跡輿地廣記云子胥伐楚還吳經此山故名伍牙建康志云俗傳伍子胥美齒牙避楚至此恐為人所識以石擊毀其牙山神為震護之不毀因名護牙二說未知孰是山下有子胥廟

荊山在溧陽縣西南四十里高六十丈周迴二十里山下有泉歲旱資以溉稻

獨山在溧陽縣西南六十五里高二十九丈周迴二十里

鐵冶山一名鐵峴山在溧陽縣西南七十里高一百八十丈周迴二十里山謾之丹陽記云永世縣南鐵峴山出鐵今揚州鼓鑄之輿地志云前代鑄錢處

三王山一名三首山在溧陽縣西南五十里高二十丈

周迴一百餘步舊志云相傳楚王與眉間尺并一客三首葬此因為名

銀方山在溧陽縣南五十三里高三十六丈周迴十五里

結都山在溧陽縣南五十里高五十八丈周迴一十八里

鷄籠山在溧陽縣南十二里高十七丈周迴三里

屏風山在溧陽縣南十五里高九丈周迴五里一百二

十四步山形如屏風

泉山在溧陽縣南二十里

石屋山在溧陽縣南六十里高三丈周迴一百步山西有鑄劍坑舊志云吳王使歐冶子鑄劍於此

嶠山在溧陽縣南二十五里高十八丈周迴五里嶠字土人音溝字書未見

懸鼓山在溧陽縣南五十里高六十丈周迴二十二里遠望若垂鼓然故以名

氫里山在漂陽縣南五十里高四十六丈周迴一十五里

金山在漂陽縣南五十里高五十丈周迴三十里

松山在漂陽縣南七十里

鐵山在漂陽縣東南五十里高六十丈周迴二十八里
古嘗出鐵今坑冶遺跡猶存唐書地理志漂陽有鐵此
即其地

新婦山在漂陽縣東南五十里高三十五丈周迴一十

八里

三鶴山一名僊山在溧陽縣東南六十里高八十丈周迴十五里昔有潘氏兄弟得道化鶴

銅官山在溧陽縣東南五十八里高十八丈周迴十六里昔嘗出銅故名唐書地里志溧陽有銅此其地也今土中熒然有銅如麤狀然董董取之不足以償費

雲泉山一名下山一名夏山在溧陽縣東南三十五里高二十二丈周迴十里有泉雲氣出焉山上有淨土

院

金鷄山在溧陽縣東十里高十二丈周迴五里

山在溧陽縣東北二十五里洮湖之上周迴十里高十一丈周處風土記云昔有山姓姥於此得道按廣韻山鳥后切山名在溧陽集韻云山名在陽羨寰宇記云常潤等州分界於此山之巔

大岬山一名大巫山一名浮山在溧陽縣東北四十五里洮湖中周迴三百五十步高八丈與宜興金壇二縣

接界山形孤秀顚顚居水中望之若浮周處風土記云
洮湖中有大岬山唐地理志云漂陽有湖山皆指此也
唐史巖撰史憲神道碑云坏山右轉洮水前臨坏字乃
為岬今從之坏岬二字土人皆音浮字書未見陶隱居
尋山志云石孤聳以獨絕岸垂天而似浮謂此山也
小岬山一名小巫山在漂陽縣東北二十五里洮湖中
周迴四里高五丈輿地志云延陵永世二縣界中有小
岬山山下有石堂堂內有虎跡水涸即見

張汶山在溧陽縣東北二十五里周迴三里高七丈

大弱山在溧陽縣北四十五里洮湖東周迴四里高一
十丈

小弱山在溧陽縣北四十里洮湖東周迴二里高六丈
雷公山一名雷山在溧陽縣北三十七里周迴五里高
十二丈巖石奇怪泉流潔清舊志云俗傳有雷公鑄劍
於此因以為名今法興寺在其下

落霞山一名霞山在溧陽縣北四十里周迴三里高九

大聖塔院在其下故又名聖塔山

平陵山在溧陽縣西北三十里周迴三里高三丈舊經云晉成帝咸和四年李閔執蘇逸於此

土山在溧陽縣北三十五里周迴三里高十二丈

黃金山在溧陽縣北七十里周迴二里高十三丈雨後土色如金

瓦屋山在溧陽縣西北八十里周迴二十里高一百六十七丈形連亘兩崖稍隆起宛如屋狀李白嘗游溧陽

望瓦屋山懷古賦詩

丫頭山一名丫僊山一名丫山在溧陽縣西北八十里
周迴三十里高一百八十五丈其山兩峯嵒然齊高如
髻聳秀可觀

分界山在溧陽縣西北八十里溧水溧陽二縣分界此
山之巔

曹山一名曹姥山在溧陽縣西北八十五里周迴二十
里高八十四丈舊志云昔曹姥獨居此山死于石室葬

山下後人為置聖姥祠祈禱多應

秀山在溧陽縣西七里周迴一里高十一丈

菱山在溧陽縣西十里周迴四里高十七丈山有龍潭
禱之有驗

姥山在溧陽縣西十里周迴六里高十二丈

大石山在溧陽縣西十五里周迴七里高二十二丈舊
志云上有龍穴禱雨有應

黃山在溧陽縣西四十二里周迴三里高五丈舊志云

黃鶴僊人於此得道因以名今有觀

谷山在溧陽縣西四十里周迴二里高十二丈

漁父山在溧陽縣西十五里

燕山在溧陽縣西九里周迴五里高二十一丈

投龍山在溧陽縣西十一里周迴六里高十二丈

石門山在溧陽縣西十三里周迴四里高十丈

呂長山在溧陽縣西二十里周迴四十里高七丈

芝山在溧陽縣西八十里周迴二十五里高四十五丈

舊志云山中嘗出芝草因以為名故老相傳梅福嘗游
隱於此

花山在漂陽縣西四十五里周迴六里高十五丈

岡嶺

壠峴坡墩墅

白土岡北連蔣山其土色白周迴一十里高十丈南至
秦淮賀若弼進軍鍾山魯廣達於白土岡與若弼旗鼓
相對隋軍退走

黃龍岡在上元縣鍾山鄉去縣十里舊傳有黃龍見於

此故名

武帳岡按宮苑記古宣武城其地本宋文帝閱武帳今謂之武帳岡南史元嘉二十二年建宇於岡上

落星岡一名落星墩在城西北九里周迴二十六里高一十二丈又江寧縣西五十里臨江亦有落星岡

事跡梁王僧辯於石頭城連營立柵至落星墩以拒侯景景大恐即此也 陳顯達舉兵以數千人登落星崗新亭諸軍聞之奔還宮城大駭 抱朴子曰落

星岡吳時星落李白嘗於落星石以紫綺裘換酒
飲為歡皆此地也

孫陵岡詳見商飈館九日臺

段石岡在城南二十里長十二里高二十二丈丹陽記
云巖山東有大碣石長二丈折為三段因以名岡詳見
三段石

石子岡一名石子墩在城南一十五里長二十里高一
十八丈吳志云諸葛恪為孫峻所害投之於此岡先是

童謡云諸葛恪何弱弱蘆單衣篋鉤絡於何相求成子
閣成子閣反語石子岡也輿地志宋大明中起迎風觀
於其上舊經云俗說此岡多細花石故名石子岡

塘岡石邁古跡編云石頭城之東有巨石俗呼為塘岡
事跡晉大興五年王氏收周顗戴若思殺於石頭東
塘頽石上百姓寃之至今紀其處

金陵岡在府城之西龍灣路上耆老言乃秦厭東南王
氣鑄金人埋於此昔有一碣刊其文曰不在山前不在

山後不在山南不在山北有人獲得富了一國後因砌靖安路失之詳見金陵辨

梅嶺岡在城南九里長六里高二丈舊經云東豫章太守梅頤家于岡下因名之上有亭為士庶游春所

黃度詩梅

岡丘壑已難尋堪恨吳兒太忍心聞道土山漂壁處原頭叢薄不成陰

朱年壠案金陵故事在江寧縣南六十七里鼓吹山前年生齊末兵亂中母亡廬墓終身負薪有白鬼紫芝生于壠至今名其居為孝感

千佛嶺在攝山栖霞寺之側齊文惠太子豫章文獻王
竟陵文宣始安王及宋江夏王霍姬齊田英等琢石建
像梁臨川靖惠王復加瑩飾嶺之中道石壁有沈傳師
徐鉉張稚圭題名

桂嶺在鍾山南明慶寺後上有桂樹因以為名

楊虞部詩步步

高如月裏攀拂雲枝葉伴雲間開花結子清香遠應
似淮南一小山馬野亭詩桂花千樹占岑巖絕勝

淮南一小山蕭籟有時吹木末天香無限滿人間懸
知彼處有金粟為見如今聞麝蘭躡磴緣崖期採摘

分明如向
月中攀

栽松峴輿地志云鍾山本多石少樹宋時詔刺史郡太

守罷官者種松各有差

楊虞部詩聳壑凌霄色共蒼森然萬樹約千行劉郎大厦尋顛

覆應是其間少棟梁馬野亭詩鍾山山上亦僅僅吏課何妨使種松還似農桑分殿最亦如榆柳計功庸初時出土平如薺後日橫空矯似龍每見路旁多合抱不知手植是誰儂

駐馬坡在清涼寺後山上舊傳諸葛亮嘗駐馬於此以

望形勢

羅北谷詩一登偉觀渺山河下有將軍駐馬坡不是胸中兵十萬長江天險誤人多葉禪詩

將軍氣勢溢山河躍馬曾來駐此坡坡下石頭城最險屯兵正自不消多

謝公墩在半山寺里俗相傳謝安所嘗登也其事殊無

所據李白王荊公皆有謝公墩詩白詩云冶城訪遺跡
猶有謝公墩乃今大慶觀冶城山昔謝安與王羲之登
冶城悠然遐思有高世之志即此荊公雖有我屋公墩
之句而又有詩云問樵樵不知問牧牧不言亦自疑之
耳江左謝氏衣冠最盛謂之謝公豈獨安也今半山寺
所在舊名康樂坊按晉書謝玄封康樂公至孫靈運猶
襲封今以坊及墩名觀之恐是玄及其子孫所居後人
因名之耳

景定建康志卷十七

欽定四庫全書

景定建康志卷十八

宋 周應合 撰

山川志二

江湖 淮附

大江隸建康府界者一百二十里西至和州烏江縣四十里以鰻鰲洲中流為界東北至真州楊子縣七十里以下蜀鎮中流為界北至真州六合縣界四十里以瓜步戍中流為界隸沿江制置司所部者一千七十一里西

至馬當東至鎮江南北兩岸皆隸焉詳見江防

事跡史記地理志三江北江從會稽毗陵縣北東入海中江從丹陽蕪湖縣東北至會稽陽羨縣東入海南江從會稽吳縣南東入海 水經及荊州記云江出岷山至潯陽分為九道東會于彭澤經蕪湖名中江東北至南徐州名為北江而入海長江有別名則有京江在南徐州禹貢所謂北江也瓜步江今揚州六合縣對潤州江寧縣即魏太武所臨處烏江即項

羽死處今和州烏江縣亦對江寧縣 吳聿靖安河
記畧曰江出岷山自湖口合流而下奔放蕩潏吞吐
日月山或磯之則其勢悍怒觸舞大舩兀若轉梗至
其廣處曠數百里斷岸相望僅指一髮而舳艫上下
中流遇風則四顧茫然無所隱避自金陵抵白沙其
尤者為樂官山李家漾至急流濁港口凡十有八處
稱號老風波而玩險阻者至是鮮不袖手 吳書魏
文帝有渡江之志望江水盛長彌漫數百里便引退

自歎曰魏雖有武騎千羣無所用也 江南野史周

世宗問孫忌江南虛實忌曰長江千里險過湯池可

敵十萬之師 晉中興書曰郭璞以中興王宅江外

乃著江賦見文選李白金陵望江詩漢江迴萬里比

湍六帝淪亡後三吳不定觀我君混區宇垂拱衆流

安今日任公子滄浪罷釣竿 曾極涉金陵大江詩

雄兵歲歲涉江干將帥誅求盡少寬未得三軍如挾

續憑誰數處卧風寒 仙巖章公權長江問對篇問

長江以汝衛南邦北人遙想心已降方今大勢全倚

汝不知汝亦許不許周人皆悠悠我心良獨憂長城

已坦道黃河已安流淮邊日夜風颼颼汝今孤矣非

昔比問汝若何真可倚長江對壯爾南邦以吾在今

來古往只東流人世興亡自更改句踐臨齊晉劉裕
入長安項王北渡黃河西破關北方或可取吾不為
君阻赤壁中流曾喪兵廣陵望見波濤驚瓜步欲渡
說虛聲南方長可守吾獨為君有吾之勢何但抵長
城長城今已平吾之力可以當百萬百萬者嘗散吾
能限南北不能輸事力吾能鼓風濤不能用英豪君
不見吳之末陳之季豈必斯時吾獨異朝無政事國
無人鳥有長江專可倚辱君有問答君知止恐知之
亦忽之煩君奉此獻之
國索裘勿俟大寒時

中江舊逕溧陽縣界古三江之一也今永陽江一名
九陽江一名潁陽江在縣西北三十五里即其遺跡
案禹貢揚州三江既入震澤底定岷山導江東迤北

會為匯東為中江入于海前漢地理志桑欽水經皆
云中江由蕪湖縣西南東至陽羨入海蓋自蕪湖逕
溧陽至宜興入震澤以下海也唐開元十七年蔣日
用作本縣城隍記云此縣南壓中江風波不借舟楫
無施縣宰喬翔創浮梁以便行旅中江橋梁之設昉
於此景福三年楊行密將臺濠作五堰拖輕舸饋糧
五堰遺跡在今溧水縣界銀林雙河東壩之地是時中江置堰江流亦既狹
矣東坡奏議云溧陽縣之西有五堰者古所以節宣

歙金陵九陽江之衆水直趨太平川蕪湖後之商人
販賣鹽木東入二浙以五堰為阻因給官中廢去五
堰既廢則宣歙金陵九陽江之水或遇暴漲皆入宜
興之荆溪由荆溪而入震澤時元祐六年也是時中
江尚通其後東壩既成中江遂不復東惟永陽江水
入荆溪謾著其詳以見溧陽亦禹跡之所歷云

秦淮舊傳秦始皇時望氣者言五百年後金陵有天子
氣於是東游以厭當之乃鑿方山斷長壘為瀆入於江

故曰秦淮案實錄淮本名龍藏浦其上有二源一發自
華山經句容西南流一發自東廬山經溧水西北流入
江寧界二源合自方山埭西注大江分派屈曲不類人
功疑非秦皇所開或曰方山西瀆直屬土山三十里是
秦開又鑿石硤山西而疏決此浦因名秦淮蓋未詳也
舊志

事跡祥符江寧圖經曰淮水去縣一里其源從宣州
東南溧水縣烏剎橋西一百五十里 丹陽記云建

康有淮源出華山入江輿地志云淮水發源於華山在丹陽湖姑孰之界西北流經建康秣陵二縣之間縈紆京邑之內至於石頭入江懸流三百許里

又云秦始皇巡會稽鑿斷山阜此淮即所鑿也亦名秦淮孫盛晉陽秋云是秦所鑿王導令郭璞筮即此淮也又稱未至方山有直瀆行三十許里以地形論之淮發源詰屈不類人功則始皇所掘疑此瀆也徐爰釋問云淮水西北貫都吳時夾淮立柵宋

元嘉中浚淮起湖熟廢田千餘頃梁作緣淮塘北岸
起石頭迄東冶南岸起後渚籬門迄三橋以防淮水
泛溢大抵六朝都邑以秦淮為固有事則浚淮拒守
今淮水貫城中東西由上下水門以達於江蓋水之

故道也

杜牧詩烟籠寒水月籠沙夜泊秦淮近酒家
商女不知亡國恨隔江猶唱後庭花

朱存

詩一氣東南王斗牛祖龍潛為子孫憂金陵地脉何
曾斷不覺真人已姓劉

曾極詩鑿斷山根後萬人

祖龍痴絕更東巡石城幾度更新主贏得淮流尚繫
秦野亭馬之純詩城中那有大川行惟有秦淮入

帝城十里牙檣並錦纜萬家碧瓦與朱甍船多直使
水無路人閘不容波作聲流到石頭方好去望中渺

渺與雲平 北谷羅疊詩秦淮橫貫帝王州萬瓦鱗
鱗枕碧流繫艇莫愁何處去綠楊深巷有青樓 葉
輝詩人言王氣在鄆州嬴政因來鑿此流地脉何曾
真斷得幾多天子御宸樓 山居劉元高橫鑿南山
貫北津安知豐沛有真人六朝
不得中原土猶使英雄欲過秦

玄武湖亦名蔣陵湖秣陵湖後湖在城北二里周迴四
十里東西有溝流入秦淮深七尺灌田一百頃 舊志

事跡案建康實錄吳寶鼎二年開城北渠引後湖水
流入新宮巡遶殿堂 丹陽記吳孫皓寶鼎年間丹
陽縣宣騫之母年八十浴於後湖化為鼃後湖又名

練湖

徐爰釋問曰本桑泊晉元帝創為此湖以肄

舟師

大興三年始創北湖築長堤以壅北山之水

東自覆舟山西至宣武城六里餘

宋元嘉中有黑

龍見因改立武湖立三神山於湖中春秋祠之石

邁古跡編曰元嘉二十三年築北堤立真武湖於樂

游苑之北湖中亭臺四所

孝武大明中大閱水軍

於湖因號昆明池而俗亦呼為飲馬塘又於湖側作

大竇通水入華林園天淵池引殿內諸溝經太極殿

由東西掖門下注城南塹故台中諸溝水常滌洄不
息建平王景素舉兵蕭道成出屯玄武湖梁徐嗣
徽等引齊兵至玄武湖侯景舉兵引玄武湖水以灌
臺城鄭文寶南唐近事云金陵北有湖周圍數十
里幕府雞籠二山環其西鍾阜蔣山諸峰聳其左
名山大川掩映如畫六朝舊跡多出其間每歲菱藕
網罟之利不下數十百千一日諸閣老待漏朝堂語
及林泉之事坐間馮謐舉元宗賜賀監三百里鏡湖

信為盛事又曰余非敢望此但賜得後湖亦暢平生
也徐鉉怡聲而對曰主上尊賢下士常若不及豈惜
一後湖所乏者知章爾馮大有慚色 國朝天禧四
年改曰放生池其後稍廢為田開十字河立四斗門
以洩湖水跨河為橋以通往來歲久堙塞今城北十
三里惟有一池而他皆廢為田龍川陳亮所謂建鄴
帶後湖為險者今不可以言險矣為形勢慮者盍圖
之

熙寧八年十一月十一日王安石奏臣蒙恩特判
江寧軍府於去年十一月十一日到任管當職事

當時集官吏軍民宣布聖化啓迪皇風終成一載所
幸四郊無壘天下同文然臣竊見金陵山廣地窄人
烟繁茂為富者田連阡陌為貧者無置錫之地其北
關外有湖二百餘頃古跡號為玄武之名前代以為
遊玩之地今則空貯波濤守之無用臣欲於內擢開
丁字河源泄去餘水決漚微渡使貧困飢人盡得螺
蚌魚蝦之饒此目下之利水退之後濟貧民假以官
牛官種又明年之計也貧民得以春耕夏種穀登之
日欲乞明勅所司無以侵漁聚斂只隨其田土色高
低歲收水面錢以供公使庫之用無令豪強大作侵
占車駕巡狩復為湖面則公私兩便矣伏望明降隆
章綏懷貧腐奉勅依案此奏狀廢湖為田蓋始於王
安石也增收後湖田租則始於趙善湖田出穀麥所
利者小湖關形勢所利者大故著廢湖之因以待復
湖之人云 宋元嘉十年顏延年從文帝樂遊苑中
觀北湖收田勤苦應詔詩曰周御窮轍跡夏載歷山

川蓄軫豈明懋善遊皆聖仙帝暉膺順動清蹕巡廣
壓樓觀眺豐穎金駕映松山飛奔互流綴緹設代迴
環神行埒浮景爭光溢中天開冬眷徂物殘悴盈化
先陽陸團精氣陰谷曳寒烟攢素既森藹積翠亦蔥
芊息饗報嘉歲通急成無年溫渥浹輿隸和惠屬後
筵觀風久有作陳詩愧未妍疲弱謝淩遽取累非纏
李張九齡詩南國更數世北湖方十洲天清華林
苑日晏景陽樓幕下迴仙騎峯傍駐綵旂鳬鷺喧鳳
管荷芰闢龍舟七子陪詩賦千人和棹謳應言在鎬
樂不讓橫汾秋風俗因紆慢江山成易由駒王信不
武孫叔是無謀佳氣日將歇霸功誰與修桑田東海
變麋鹿姑蘇遊否運爭三國康時劣九州山雖幕府
在飲豈豫章留水淀還相閱菱歌亦故適雄圖不足
問唯想是風流李白詩空餘後湖月波上對瀛洲
唐李義山詩玄武湖中玉漏催雞鳴埭口綉繡迴
誰言瓊樹朝朝見不及金蓮步步來野亭馬之純

詩萬頃真茫水拍堤當時於此習舟師長江天險雖
堪恃關艦人謀可勿施莫使黑龍離舊窟且教玄武
入新詞如何又作蓬瀛景時節來遊看水嬉曾極
詩當日湖光徹鏡心龍旗鳳吹此登臨而今鐵馬迴
旋地斜點黃塵一尺深朱存詩雷轟疊鼓火翻旗
三異翩翩試水師驚起黑龍眠此下原缺十八行
雲歸片帆起之句

絳巖湖一名赤山湖在句容縣西南三十里去府六十
里源出絳巖山周迴二十里下通秦淮舊志

事跡石邁古跡編曰赤山湖在上元句容兩縣之間
溉田二十四埭南去百步有盤石以為水疏閉之節

南史沈瑀傳明帝復使築赤山塘所費減材官所量數十萬即此湖塘也 唐麟德中令楊延嘉因梁

故隄置後廢大歷十三年令王昕復置周百里為塘立二斗門以節旱暵開田萬頃 元和郡國志句容

赤山湖在縣南三十五里 茅山記太元真人內傳

曰江水之東金陵之地左右間有小澤澤東有句曲之山陶隱居曰小澤即謂今赤山湖也從江東來直對望山 今此湖半屬句容半屬上元舊收歲課錢

二百二十貫咸平三年正月奉勅除放

湖條江寧府上元句容兩縣臨泉通德湖熟崇德丹陽
臨淮福祚甘棠舊額八鄉今併入丹陽臨泉福祚甘棠
四鄉百姓自來共貯水絳崑湖澆灌田苗下有百堽堰
捺水其湖上接九源山其堰下通秦淮江自吳赤烏二
年到今已七百餘年其湖東至數堽西至雨壇南至赤
岸北至青城舊日春夏貯水深七尺秋冬貯水深四尺
先是麟德二年前縣令楊延嘉并建兩斗門立碑碣具

言周回僅百里州司尋差十將丁籌計生徐巖巡湖打量得一百二十二里九十六步廬尚書判置湖貯水本為溉田若許侵耕難防災旱取定四尺水則使其澆九鄉田苗

九鄉跨句容上元二縣

若過令深廣又慮浸毀若逢曠旱

之年須稍更增加今且定取五尺水則其不及處且任耕墾種植如有人於五尺水則內盜耕一畝一角推勘得實其犯條人斷遣令衆十日放本管湖長不覺察亦並施行又據十將丁籌狀廬發亭北邊去岸約有二百

來步有一盤石東西濶四尺七寸南北濶三尺五寸石面中心去水面一尺六寸五分即是五尺之則并有察柱仰下縣便於石上磨刮更刻字記其湖仍每季一申不得鹵莽戴經新塘有豐等三湖圍埤內田多是私函取水澆灌田苗准舊例放絳巖湖水下秦淮三日取指揮給放不得專擅開函取水其湖先有傳食田五十畝句容縣弓量二十畝三十步上元縣弓量二十畝三十步百堽堰與絳巖湖同置絳巖湖貯水百堽堰捺水保

大中曾別差官親到赤山湖所建斗門三所通放湖水
出入常令湖中積水五尺其斗門或遇山水擁下高於
湖內水面即須全開三所斗門放水入湖候外溪水退
却放水出溪下秦淮入江專須酌量湖水不得失於元
則右前件湖堰承舊澆灌九鄉田苗共一千餘頃畝伏
奉省符帖命指揮修作貯水逐鄉差承潤戶管當先有
條流歲久去失續於晉天福年中再興工役修作經今
六十餘年伏遇明朝重興添修建造貯捺百里溪汊山

源賑卹耕民備供王賦累奉勅恩給賜料物及借助日
食等差兩縣官員置造斗門三所計用一萬七千六百
八十工及添修湖埂并百堰堰共計三萬三千六百八
十工衆議重置條流嚴加束轄謹連符條如前伏乞員
外尊慈特賜判印指揮永為證據建隆查員外乾德伍
侍御開寶王司空閻侍御魏司空盧司直林員外並判
執條常加束轄慶歷三年二月十八日葉龍圖知建康
府日於古來舊湫處置立大石柱一條將湖心盤石水

則刻於柱上永為定則

樊珣記句容西南三十三里曰赤山天寶中改為絳巖
山以文變質也山外周流厥有湖塘舊址考於前志則
曰吳人創之梁人通之矣洎金火有變積為習坎灌莽
之所我唐麟德歲邑宰楊嘉延亦纂前服利農為名雖
迹於傳聞而事斯茫昧楊氏之後又餘百年實滋菰蒲
莫植粳稻剥極則賁俟能而伸大厯十二祀縣大夫兼
大理司直太原王公昕能蘇罷勞一作人且易樊俗臨湖

而歎以欲從人吟使臣之清風酌良牧之高課將圖永
逸匪顧暫勞因察其地形訪以輿誦謀始作則定徒撰
工月在休農雲其荷鍤周匝百頃

一作里

蓄為湖塘置兩

斗門用以為節旱暵則決而全注霖潦則瀦而不流收
功濟時道甚明遠開田萬頃贍戶九鄉洎成輿區頗無
凶歲魚稻之盛公實為之昔叔敖芍陂能張楚國史起
漳水竟富魏邦秦稱鄭白漢歌邵杜皆謂是也每商羊
罷舞龍見而雩比屋有憂於銷鑠連阡莫覩于耘耨茲

則黛波齠淪白鳥飛滅下洞庭之鳬雁泳中流之鱣鮪
橫塘之右構為新亭芬其芰荷樹以杞柳楊楚江嶺懂
懂是途行李實獲于廕庥詠歌或借于觀覽懿乎哉君
子之用心也孰愈崇其島榭侈以林堂此而莫文翰墨
奚述大厯十二年十月三日記右丹陽絳巖二湖雖在
外縣以其利民者廣故先志之尤加詳焉

迎擔湖在城西北石頭城後五里今為田

舊志

事跡晉元帝南渡衣冠席卷過江客主相迎負擔於

此湖側至今名迎擔湖 實錄云費縣西北有迎擔
湖溉田三十頃 袁粲敗劉彥節走迎擔湖 陳軒
金陵集有李建勲朱存迎擔湖詩

蘇峻湖在城西北一十五里周迴十里灌田一十二頃
案南徐州記迎擔湖西北有蘇峻湖本名白石陂舊志
事跡晉咸和二年蘇峻舉兵於石頭陶侃溫嶠庾亮
陣於白石使將軍楊謙攻於石頭峻輕騎出戰謙詐
奔白石壘峻逼之纔交鋒峻墜馬侃督護李陽臨陣

斬峻于白石陂岸至今呼此陂為蘇峻湖

張陣湖在石頭城後舊傳蘇峻與晉軍嘗戰于此至今湖側高墩上有蘇大將祠案晉書峻起兵據石頭北湖距石頭纔八里今屬金陵鄉去城十三里

夏駕湖在城東南五十里屬上元縣丹陽鄉今為田

舊志

事跡曹憲揚州記云晉惠帝永寧二年有石浮來建鄴自秦淮夏駕湖登岸二百餘步百姓咸曰石來石來至明年石冰果入揚州 沈約宋書晉惠帝太安

元年丹陽湖熟縣夏駕湖有大石浮二百步而登岸
民驚謠曰石來于寶曰尋有石冰入建鄴今丹陽鄉
范墟渡舊有石浮數尺形如碌碡父老云即古夏駕
湖浮來石也

半陽湖一名半湯湖在城東北四十里周迴十五里水
同一壑而冷熱相半

舊志

事跡輿地志及南徐州記云江乘縣南有半陽泉半
冷半熱熱處可爛物冷處如冰熱處魚入冷處即死

冷處魚入熱處亦死民種稻則溉熱水一年再熟今
下蜀鎮有溫湯唐丞相韓滉小女有疾浴溫湯即愈
此在上元縣境 西陽雜俎云句容縣吳瀆塘其水

半冷半熱可以淪雞子此又一湖也

馬之純詩一半寒泉一半湯同為此

水異炎涼湯泉是處雖多有鍾阜斯池特廣長誰說
吹噓如口鼻或云底下有流黃好尋舊迹重開鑿地
寶無容久瘞藏 朱存詩江南龍節水為鄉水不
純陰又半陽一片湖光共深淺兩般泉脉異溫涼

攝湖在城東北五十里周迴二十里江乘縣記云湖在
攝山之側因以為名

三岡湖在城東六十四里周迴一十里溉田八十頃地
有三岡俯臨湖側因以為名

烏意湖在城東八十里周迴三里溉田一十頃

鷺雀湖在城東三里周迴二里流入青溪古老相傳今
斜橋即走馬橋橋之東有水平濶是也或云今惟政鄉
白蕩湖即其地

舊志

事跡輿地志云走馬橋側有鷺雀湖窮神秘苑曰梁
昭明太子在東宮有一琉璃盃紫玉杯皆武帝所賜

也既薨詔置梓宮後更葬開墳為閹人攜入大航乃

有鶯雀數萬擊之因為有司所縛乃獲二寶器帝聞

而驚異詔以賜太孫封墳之際復有燕雀數萬銜土

以增其上墳側今有湖後人因名燕雀湖

楊備詩平湖岸側見

高墳萬土

銜來燕雀羣鑑面無波天一色此中丈藻

似儲君

馬之純詩在昔曾為舜帝坟象來耕鑿鳥

來芸今茲封土麒麟冢乃有銜泥燕雀羣玉海冲融
俾至性錦江燦爛擬高文區區羽物猶依戀想見人

倚望

白雲

婁湖在城東南一十五里周迴一十里灌田二十頃水

流入艦澳輿地志云婁湖苑吳時張昭所創有湖以溉田宋時築為苑張昭封婁侯故謂之婁湖

高亭湖在城東南三十里周迴二十里溉田三十五頃丹陽記云王仲祖墓東南一十六里有高亭湖

葛塘湖在城東南七十二里周迴七里溉田四十頃舊經云昔葛仙翁於此煉丹故以名之

劉陽湖在城東南六十里周迴三十里溉田三十頃白社湖在城東南二十五里周迴十里溉田一十頃

銀湖在城南七十里周迴一十三里溉田二十頃

石坊湖在城南五十三里周迴二十二里溉田四十頃

白都湖在城南七十里周迴八里溉田二十五頃西連

白都山

筴湖在城南六十里周迴五里溉田一十五頃

梁墟湖在城南二十五里周迴十餘里溉田二十頃

河湖在城西南七十里周迴八里溉田一十頃

三城湖在城西南七十三里周迴一十五里中有三小

城故名

江城湖在句容縣西北六十里計一百八十畝深六尺二寸灌溉田八百畝屬琅邪鄉二十八都

固城湖在溧水縣西南九十里周迴一百里深三丈南北三十里東西二十五里環楚王故城有水四派湖中流與太平州接界與丹陽湖石臼湖號曰三湖東經五堰自常州宜興縣界流入太湖此道今已堙塞

石臼湖在溧水縣西南四十里縱五十里衡四十里西

連丹陽湖湖中有軍山塔子馬頭崔壘四山其水舊有
二派入龍潭梅梁港經湯家步通濁水此道今堙塞

長塘湖在溧陽縣北五十里周迴一百五十里接金

壇宜興縣界舊名洮湖

舊志

事跡周處韋昭鄴道元皆以此湖為五湖之一中有
浮山其水東連震澤春夏深秋冬淺 虞翻曰太湖
有五湖故謂之五湖潞湖洮湖射湖貴湖及太湖為
五湖並太湖之小支俱連太湖故太湖兼得五湖之

名注云洮湖一名長塘湖在義興 張勃吳錄云五
湖者太湖之別名以其周行五百餘里故以五湖為
名 國語吳越戰於五湖直在笄澤一湖中耳范蠡
遊五湖即此是 郭璞江賦云彭蠡青草具區洮潞
以為五湖洮音姚廣韻洮餘昭切五湖名 南徐州
記云延陵縣東南長塘湖又名洮湖 輿地志云臨
津西有長塘湖屬延陵永世二縣西受溧水通溧陽
縣界 周處風土記云洮湖別名長塘湖 晉咸和

四年韓晃南走將軍王允之追躡於長塘湖大破之
王恭於京口起兵誅執政事敗走至長塘湖即此
是也 咸和四年蘇逸以萬餘人自延陵湖將入吳
興將軍王允之及逸戰於溧陽獲之亦此處也 按
湖即古延陵尉所居其水東連震澤入松江至宋以
庾業代義興太守劉延熙業至長塘湖即與延熙合
制遣沈懷明等東討卒破業於湖夾岸築壘即此湖
也春夏水深五尺餘秋冬差淺受大溪南流三十里

至大坯山 張籍長塘湖詩一斛水中半斛魚言湖
中多魚如此 祥符圖經云周迴一百二十里

朱湖在溧陽縣今不詳所在郭景純江賦云其旁則有
具區洮潏朱漥丹濞酈道元水經注云朱湖在溧陽今
溧陽湖泊為多或謂之滄名稱更易古跡之可見者鮮
矣或謂朱湖即丹陽湖之異名未詳

千里湖在溧陽縣東南十五里晉書陸機云千里蓴羹未
下鹽豉南史沈文季云千里蓴羹豈關魯衛皆指此地

也至今產美蓴俗呼千里滄與故縣滄相連或說千當作芋末當作秣千末皆省文也秣下即秣陵太氏縣境產蓴多且肥美藏蓄可以致遠

昇平湖在溧陽縣西七十里外自溧水縣五堰東流入湖即古中江所逕之地又有溪水南自建平縣梅渚鎮來會

三塔湖一名梁城湖在溧陽縣西七十里周十八里西南與昇平湖相接張孝祥有詩

黃山湖在溧陽縣西南三十七里黃山下周迴五里

下湖在溧陽縣南一十里周迴五里流經白雲逕東入太湖

西子湖在城東五十里周迴五里溉田五十頃長樂崑崙墩之西有村曰西子其側有湖因以為名

慈湖在江寧縣界接太平州湖濱有巡檢寨

事跡石季龍寇歷陽趙嗣屯慈湖蘇峻敗司馬流於慈湖

白米湖在上元縣東與句容下塘村相接地產白米

溪澗

青溪吳大帝赤烏四年鑿東渠名青溪通城北塹潮溝
濶五丈深八尺以洩玄武湖水發源鍾山而南流經京
出今青溪閘口接於秦淮及楊溥城金陵青溪始分為
二在城外者自城壕合於淮今城東竹橋西北接後湖
者青溪遺迹固在但在城內者悉皆堙塞惟上元縣治
南迤邐而西循府治東南出至府學墻下皆青溪之舊

曲水通秦淮而鍾山水源久絕矣

舊志

事跡輿地志云青溪發源鍾山入於淮連綿十餘里
溪口有埭埭側有神祠曰青溪姑今縣東有渠北接
覆舟山以近後湖里俗相傳此青溪也其水迤邐西
出至今上水閘相近皆名青溪 溪舊有七橋晉郗
僧施嘗泛舟青溪每溪一曲作詩一首謝益壽聞之
曰青溪中曲復何窮盡蓋謂此也 陶季直京都記
云京師鼎族在青溪埭尚書孫瑒尚書令江總宅當

時並列溪北 晉王含帥王敦餘黨自竹格渚濟沈
充自青溪會之至宣陽門蘇峻等出南塘橫擊大破
之 桓彝別傳曰明帝世彝與當世英彥名德庾亮
溫嶠羊曼等共集青溪之上郭璞與馬乃援筆屬詩
以白四賢并以自序 世說云周顗罷臨川還都泊
青溪時夏暴雨船舫狹小而漏殆無坐處丞相王導
曰胡威之清何以過此 齊高帝先有宅在青溪生
武帝及即位以宅為青溪舊宮 永明元年望氣者

言新林婁湖有王者氣帝廼築青溪舊宮作新婁湖苑以厭之 卞彬嘗於東府謁齊高帝時高帝為齊

王彬曰殿下即宮東府則以青溪為鴻溝鴻溝以東為齊以西為宋仍誦詩云誰謂宋遠跂予望之遂大忤旨 隋煬帝平陳斬張麗華孔貴嬪二人於青溪

柵下

虞部楊公備詩傾城傾國兩妃嬪此地聞名不見人潛想舊時紅粉面落花風裏步香塵 闕

名詩竟煩擒虎到青溪此夜應無壁月詞迎刃春風殘尤物岸花隨雨淚胭脂 任斯庵詩蛾眉流落碧流中走馬來時事已空此日不能留姐已他年誰敢憶高公又青溪不見麗華留遺恨空餘故國羞壁月

只應明結綺春風吹不上迷樓又開門忽憶東風面
步向青溪遠碧灣淡白深紅了無迹綠楊烟外一鍾

山今建元寺東南角度溪有橋名募士橋吳大帝募

勇士處其橋西南角過溝有埭名雞鳴埭齊武帝早

遊鍾山射雉至此雞始鳴因名焉其溝是吳郗儉所

開在苑城後晉修苑城為建康宮即城北塹也

王維詩言

入黃花川每逐青溪水隨山將萬轉趣途無百里聲
喧亂石中色靜深松裏漾漾沈菱荇澄澄映葭葦我
心素已閒清朋淡如此請留盤石上垂釣將已矣
張顥詩旅人倚征棹薄暮起勞歌笑攬青溪月清輝
不厭多節使吳公琚遊青溪有詞呈野亭馬公岸
柳可藏鴉路轉溪斜忘機鷗鷺滿汀沙咫尺鍾山迷

望眼一片雲遮臨水整烏紗鬢影蒼華酒闌却念在
天涯幾日不來春便晚開盡桃花野亭跋其後云秦
淮海之詞獨擅一時字未聞朱寶晉善詩然終不及
字若公可兼之矣辛酉季春承議郎充江南東路轉
運司主管文字馬之純謹書野亭詩云人道青溪有
九曲如今一曲僅能存江家宅畔成花圃東府門前
作菜園登閣尚堪觀疊障泛舟猶可醉芳樽料應當
日皆無恙苔雪滿湘不足言又人日泛青溪青溪曲
易迷船迴波下上簾捲日東西景物行行
見壺觴處處攜浮舡閒得醉極目水雲低

龍川陳

亮論建業形勢擁秦淮青溪以為阻今青溪九曲僅
存其一馬公光祖後而深廣之建先賢祠及諸亭館
於其上築堤飛橋以便往來游人泛舟其間自早至

暮樂而忘歸詳見先賢祠及亭館下

白雲溪一名白雲逕在溧陽縣東十里清澈可翫東流
入荆溪

鎖石溪在上元縣東南四十八里源發白石巖經攝湖
六十餘里入大江其源上通數里山澗曲屈隨下奔注
不類人功開鑿

長溪在上元縣東南六十里濶五丈丹陽記云湖熟前
有長溪東承句容縣赤山湖水入於秦淮

白李溪在句容縣小茅峰北昔高辛時展上公居於溪
上手植白李而食之道成仙去

上容溪在句容縣水源出中茅過蘆江橋經赤山湖入
秦淮

谷溪在溧陽縣南二十里源出青山曲折流一百十里
下合於瀨水

食溪在溧陽縣西六十里源出谷山東北流入長塘湖
高友溪在溧陽縣南二十里源出廣德諸山至此聚而

為溪下經黃墟蕩合於白雲逕

舉善溪在溧陽縣南三十里源出廣德諸山至此聚而為溪合於高友溪

楚王東西二澗在茅山

事跡楚王來游頓兵於此因名舊記云崇禧觀東二澗是也並華陽洞天三水合流直至崇禧觀門前

落馬澗一名南澗在江寧縣南五里東北流入城濠

事跡宋孝武討元兇元兇軍敗人馬傾滿澗中時人

呼為落馬澗陳亡涸竭

蘼蕪澗在上元縣城東三十里青龍山前路出檀橋

事跡金陵故事齊處士劉璵居此璵為儒林之宗年
至四十未婚其友為娶王氏乃詣澗折蘼蕪而去因

名蘼蕪澗

玉澗今蔣帝廟側緣山澗是

徐鉉詩云鍾山祠畔宿烟晴玉澗橋邊碧樹春李湜

詩云迸石如散
珠穿雲似流玉

東澗在鍾山寶公塔之西宋熙寺基之東

事跡石邁古跡編云梁處士劉許彥度隱居之所許
尤精釋典嘗聽講鍾山諸寺因卜築宋熙寺東澗有
終焉之志

鶴臺澗在茅山大茅峰之東北嘗有鶴羣往來於此澗
後有道士張元之築臺以居焉

宜東澗在大茅山西二里昔有仙人展上公於此種碧
柰貨丹砂故名今楊尚書山居是也

上湖澗在溧陽縣西六十里源在廣德軍東北流入縣

界合於白雲溪

冷水澗在句容縣玉晨觀北

流杯澗在句容縣雷平山西大路下

景定建康志卷十八